

# Ang Pulong Sa Dios Miabot Ngadto Sa Propeta William Marrion Branham

## **“Si Jesus Cristo Mao Ang Dios”**

*Karon mao kana ang pinadayag: si Jesus Cristo mao ang Dios. Ang Jehova sa Daang Tugon mao ang Jesus sa Bag-o. Bisan unsaon pa ninyo sa pagpamugos, dili ninyo mapamatud-an nga adunay TULO ka Dios. Apan nagkinahanglan usab kini ug pinadayag pinaagi sa Balaang Espiritu aron ipasabot kaninyo ang kamatuoran nga Siya Usa ra. Nagakinahanglan kini'g pinadayag aron makita nga ang Jehova sa Daang Tugon mao ang Jesus sa Bag-o. Mikamang pasulod sa iglesia si Satanas ug gibutahan ang mga tawo sa niining kamatuoran. Ug sa dihang nangabutahan na sila niini, wala magdugay hangtud nga ang Iglesia sa Roma gihunong na ang pagpangbautismo sa Ngalan ni Ginoong Jesus Cristo.*

Ginaangkon ko nga nanginahanglan kini ug usa ka matuod nga pinadayag gikan sa Balaang Espiritu aron makita ang kamatuoran mahitungod sa Pagka-Dios niining mga adlaw sa dihang anaa kita sa taliwala sa pagpang-tuis sa daghang Kasulatan. Apan ang nagamadaugon, malamposon nga iglesia maoy natukod sa pinadayag busa makapaabot kita nga ipadayag sa Dios kanato ang Iyang kamatuoran. Bisan pa niana, dili na ninyo sa pagkatinuod gikinahanglan ang usa ka pinadayag mahitungod sa bautismo sa tubig. Anaa na kini diha mismo nga dayag na sa inyong atubangan. Mahimo ba diay diha sa usa ka minuto nga mahisalaag ang mga apostoles gikan sa usa ka direkta nga sugo sa Ginoo sa pagpangbautismo sa Ngalan sa Amahan ug sa Anak ug sa Espiritu Santo ug dayon mahikaplagan nga sa tinuyo nagmasupilon sila? Nasayod sila kung unsa ang Ngalan, ug wala ni usa ka bahin sa Kasulatan diin nagpangbautismo sila sa bisan unsa pang pamaagi gawas lamang sa Ngalan ni Ginoong Jesus Cristo. Ang sentido komun mobungat kaninyo nga ang Basahon sa Mga Buhat mao ang iglesia nga anaa sa pagpamuhat, ug kung nagpangbautismo sila sa nianang paagi, nan ingon niana ang pagbautismo. Karon kung ginahunahuna ninyo nga bug-at ra kana, unsa man ang inyong panghunahuna bahin niini? Ang si bisan kinsa nga wala pa nabautismohan sa Ngalan ni Ginoong Jesus gikinahanglan nga mabautismohan pag-usab.

Mga Buhat 19:1-6, “Ug nahitabo, nga, sa didto pa si Apolos sa Corinto, si Pablo sa nalatas na niya ang mga kayutaan sa ibabaw miabot sa Efeso: ug didto natagbo niya ang pipila sa mga tinun-an, Siya miingon kanila, Nakadawat ba kamo sa Espiritu Santo sukad nga mitoo na kamo? Ug miingon sila kaniya, Wala gani kami makadungog nga aduna ba diay Espiritu Santo. Ug siya miingon kanila, Sa unsa ba diay kamo gipangbautismohan? Ug miingon sila, Sa bautismo ni Juan. Dayon miingon si Pablo, Si Juan sa pagkatinuod nagbautismo sa bautismo sa paghinulsol, nga ginasultihan ang katawhan, nga kinahanglan motoo sila Kaniya nga moabot gayud sunod kaniya, nga mao, si Jesus Cristo. Sa pagkadungog nila niini, gipangbautismohan sila sa Ngalan ni Ginoong Jesus. Ug sa napandongan na sila ni Pablo sa iyang mga kamot, mikunsad kanila ang Espiritu Santo; ug sila nanagpanulti sa laing mga pinulongan, ug nanaghimo’g mga propesiya.” Atua ra. Kadtong mga maayong tawo sa Efeso nakadungog na’g bahin sa umaabot nga Mesias. Gikawali na Siya ni Juan. Napangbautismohan na sila ngadto sa paghinulsol sa mga sala, nga nagalantaw sa UNAHAN ngadto sa pagtoo kang Jesus. Apan karon mao na ang panahon aron sa paglantaw BALIK ngadto kang Jesus ug nga mabautismohan alang sa KAPASAYLOAN sa mga sala. Panahon na kadto sa pagdawat sa Espiritu Santo. Ug sa dihang nabautismohan na sila sa Ngalan ni Ginoong Jesus Cristo, gipandongan sila ni Pablo sa iyang mga kamot ug ang Espiritu Santo mikunsad diha kanila.

Oh, kadtong mga hinigugmang katawhan didto sa Efeso mga maayong tawo; ug kung aduna may katungod nga mobati nga luwas na, mao kadto sila. Himatikdi kung unsa na kalayo ang ilang naabot. Nakaabot na sila hangtud sa pagdawat na sa umaabot nga Mesias. Andam na sila niadto alang Kaniya. Apan wala ba ninyo makita nga bisan pa niana wala nila Siya nahimatikdan? Nakaabot na Siya ug nakabiya na. Gikinahanglan nila nga mabaustimohan sa Ngalan ni Ginoong Jesus Cristo. Gikinahanglan nila nga mapuno sa Espiritu Santo.

Kung kamo nabautismohan na sa Ngalan ni Ginoong Jesus Cristo, magapuno ang Dios kaninyo sa Iyang Espiritu. Mao kana ang Pulong. Ang Mga Buhat 19:6 nga atong gibasa mao ang katumanan sa Mga Buhat 2:38, “Maghinulsol, ug magpabautismo *ang tagsatagsa* kaninyo sa Ngalan ni Ginoong Jesus Cristo alang sa kapasayloan sa mga sala, ug madawat ninyo ang gasa nga Espiritu Santo.” Kita n’yo, si Pablo, pinaagi sa Espiritu Santo, gisulti sa tukma gayud ang kon unsay giingon ni Pedro pinaagi sa Espiritu Santo. Ug kon unsa man ang nasulti na DILI MAHIMONG usabon pa. Gikinahanglan nga mao ra Kini sa gihapon gikan sa Pentecostes hangtud nga mabautismohan na

ang katapusang usa nga pinili. Mga Taga-Galacia 1:8, “Bisan pa kon kami, o usa ba ka manulonda nga gikan sa langit, magwali kaninyo ug uban pa nga Maayong Balita nga lahi kay sa among gikawali na kaninyo, ipatunglo siya.”

Karon ang pipila kaninyo nga mga Oneness nagapangbautismo ug sayup. Nagabautismo kamo alang sa pagkatawo pag-usab ingon nga sa paglusbog sa tubig naluwas na kamo. Ang pagkatawo pag-usab dili nagaabot pinaagi sa tubig; usa kini ka buhat sa Espiritu. Ang maong tawo nga pinaagi sa Espiritu Santo mihatag sa sugo, “Maghinulsol ug magpabautismo ang tagsatagsa sa Ngalan ni Ginoong Jesus,” wala mag-ingon nga ang tubig maoy mihimo sa pagpakatawo pag-usab. Ang giingon niya nga usa lamang kadto ka pagpamatuod sa usa ka “maayong konsensya ngadto sa Dios.” Mao lang kadto. I Pedro 3:21, “Nga maoy hulagway niini ang bautismo usab nagaluwas kanato karon (dili sa pagtangtang sa kahugawan sa unod, kondili ingon nga pangaliyupo sa atubangan sa Dios alang ngadto sa usa ka maayong konsensya,) pinaagi sa pagkabanhaw ni Jesus Cristo.” Ginatoohan ko kini.

Kung may usa man nga pagkadunay sayup ang panghunahuna nga mapamatud-an sa kasaysayan nga gihimo ang bautismo sa tubig diha sa uban pang pamaagi gawas sa Ngalan ni Ginoong Jesus Cristo, tambagan ko kamo nga basahon ang mga kasaysayan ug susiha alang sa inyong kaugalingon. Ang mga mosunod mao’y usa ka matuod nga nadokumento bahin sa usa ka Bautismo nga nahitabo kaniadto sa Roma A.D. 100 ug namantala diha sa TIME magazine, sa Disyembre 5, 1955. “Gipataas sa diyakono ang iyang kamot, ug misulod si Publius Decius sa pultahan sa bautisteryo. Nagatindog nga taga-hawak ang ka halawum sa bautismohanang mao si Marcus Vasca nga mamaligyaay sa kahoy. Nakapahiyom siya samtang nagaubog na sa bautismohanang si Publius nga duol kaniya. ‘Credis?’ ang pangutana niya. ‘Credo,’ ang tubag ni Publius. ‘Nagatoo ako nga ang akong kaluwasan nagagikan kang Jesus nga Cristo, Kinsa gilansang sa krus ilalum sa pangatungdanan ni Poncio Pilato. Nga kauban Niya ako namatay aron sa ingon makabaton ako ug Kinabuhi nga Walay katapusan kauban Niya.’ Dayon nabati niya ang kusgan nga mga braso nga nagaalalay kaniya samtang gipauyon niya ang iyang kaugalingon pahigda lusbog sa tubig, ug nadungog sa iyang dalunggan ang tingog ni Marcus—‘Ginabautismohan ko ikaw sa Ngalan ni Ginoong Jesus’—samtang ang mabugnaw nga tubig mitabon kaniya.”

Nagpadayon kadto hangtud ang maong kamatuoran nawala (ug dili na mibalik hangtud na niining katapusang kapanahonan—naggikan kini sa Nicaea hangtud sa pag-abot

niining maong gatusan ka katuigan) nagpangbautismo sila kaniadto sa Ngalan ni Ginoong Jesus Cristo. Apan mibalik na kini. Dili mapugngan ni Satanas ang pinadayag kung buot na sa Espiritu nga ipadayag kini.

Oo, kung aduna may tulo ka mga Dios, tingali maayo gayud nga magbautismo ka alang sa usa ka Amahan, ug usa sa Anak ug usa sa Espiritu Santo. Apan ang PINADAYAG NGA GIKAHATAG KANG JUAN mao nga adunay USA KA DIOS ug ang Iyang Ngalan mao si GINOONG JESUS CRISTO, ug nagabautismo ka alang sa USA ka Dios ug bugtong usa ra. Mao kana kon ngano nga si Pedro nagbautismo sa paagi nga iyang gibuhat sa Pentecostes. Kinahanglan nga matitud-anon siya sa pinadayag nga, “Ipakisayod gayud sa tibuok banay sa Israel, nga gihimo sa Dios kanang MAO RANG JESUS, Kinsa inyong gilansang sa krus, MAO RANG GINOO UG CRISTO.” Mao na kana Siya, “Ang GINOONG JESUS CRISTO.”

Kung si Jesus maoy “MAO RANG” Ginoo ug Cristo, kung ingon niana Siya (si Jesus) mao, ug dili na mahimong uban pa kondili “Ang Amahan, Anak, ug Espiritu Santo” sa USA ka Persona nga nadayag diha sa unod. Kini maoy DILI “Ang Dios diha sa tulo ka mga persona, sa balaan nga trinidad,” kondili USA KA DIOS, USA KA PERSONA nga adunay tulo ka medyor nga mga titulo, nga adunay tulo ka mga opisina nga ginapahayag kadtong mga titulo. Patalinghugi kini pag-usab. Kining mao ra nga Jesus maoy “MAO RANG Ginoo ug Cristo.” Ginoo (ang Amahan) ug Cristo (ang Espiritu Santo) mao si Jesus, tungod kay Siya (si Jesus) maoy ang MAO RA sila (ang Ginoo ug Cristo).

Kung dili pa niana ginapakita kanato ang matuod nga pinadayag sa Pagka-Dios, wala nay mohimo pa niana. DILI nga lain pang usa ang Ginoo; DILI nga lain pang usa si Cristo. Kini nga Jesus mao ang Ginoong Jesus Cristo—ANG USA RA NGA DIOS.

Usa niana ka adlaw miingon si Felipe kang Jesus, “Ginoo, ipakita kanamo ang Amahan ug igo na kini kanamo.” Si Jesus miingon ngadto kaniya, “Kadugay Ko nang pakig-uban kaninyo ug wala ka pa makaila Kanako? Ang nakakita Kanako nakakita sa Amahan, busa nganong moingon ka man, Ipakita kanamo ang Amahan? Ako ug ang Akong Amahan Usa ra.” Akong gikutlo kana sa usa ka higayon ug ang usa ka babaye miingon, “Sa makadiyut lang, Mr. Branham, ikaw ug ang imong asawa usa ra.” Miingon ko, “Dili ingon niana nga klase.”

Miingon siya, “Pasaylo-a ko?”

Busa giingnan ko siya, “Makita mo ba ako?”

Miingon siya, “Oo.”

Miingon ko, “Makita mo ba ang asawa ko?”

Siya miingon, “Dili.”

Miingon ko, “Nan kana nga pagka-usa lahi nga klase, kay Siya nag-ingon, Sa dihang makita ninyo Ako, makita ninyo ang Amahan.”

Miingon ang propeta nga magkaadunay kahayag sa panahon sa kagabhion. Nahisulat kini sa alawiton;

Maanaay Kahayag sa panahon sa kagabhion,  
Ang dalan ngadto sa Himaya imo gayud  
hikaplagan,  
Diha sa gidulngan sa tubig, mao kanay  
Kahayag karon,  
Gilubong sa bililhong Ngalan ni Jesus.  
Bata’g tigulang, hinulsolan ang tanan ninyong  
sala,  
Ang Espiritu Santo siguradong mosulod na.  
Ang mga Dan-ag sa kagabhion miabot na,  
Kini ang kamatuoran nga ang Dios ug si  
Cristo usa ra.

Dili pa lang dugay nakighinabi ako sa usa ka Judio nga Rabbi. Miingon siya kanako, “Kamong mga Gentil dili ninyo mahimong putol-putolon ang Dios sa tulo ka buok ug ihatag Siya ngadto sa usa ka Judio. Mas labaw pa kaming nasayod kaysa niana.”

Miingon ako kaniya, “Mao gyud kana Rabbi, wala namo ginaputol-putol ang Dios diha sa tulo ka buok. Nagatoo ka sa mga propeta, dili ba?”

Miingon siya, “Nagatoo gyud ako.”

“Ginatooan mo ba ang Isaias 9:6?”

“Oo.”

“Kinsa man kadto ang ginatumbok sa maong propeta?”

“Ang Mesias”

Miingon ako, “Unsa man ang mahimong relasyon sa Mesias ngadto sa Dios?”

Ang giingon niya, “Mamahimo Siyang Dios.”

Miingon ako, “Husto kana.” Amen.

Dili mo mahimong himoon ang Dios ngadto sa tulo ka persona o tulo ka mga bahin. Dili mo mahimong isulti ngadto sa usa ka Judio nga adunay usa ka Amahan, ug usa ka Anak, ug usa ka Espiritu Santo. Ingon ka dayon niya diretso kung asa kini naggikan nga panghunahuna. Nasayod ang mga Judio nga kini nga kredo namugna sa Konseho sa Nicaea. Dili ikahibulong nga ginalibak nila kita ingon nga mga pagano.

Nagahisgot kita bahin sa usa ka Dios nga dili nagausb. Nagatoo usab niana ang mga Judio. Apan giusab sa iglesia ang dili-nagakausb nga Dios gikan sa USA ngadto sa TULO. Apan ang kahayag nagabalik na sa panahon sa kagabhion. *Daw sa unsa ka makapakurat nga kini nga kamatuoran miabot sa maong panahon kon diin nga ang mga Judio nagapamalik na sa Palestina.* Ang Dios ug si Cristo USA RA. Kini nga Jesus MAO RA ANG GINOO UG CRISTO.

Anaa kang Juan ang pinadayag, ug si Jesus kadto mao ang Pinadayag, ug gipadayag Niya ang Iyang Kaugalingon mismo dinhi sa Kasulatan—“AKO MAO Siya Nga Kaniadto, Nga Karon ug Ang Umaabot, ang Makagagahum sa Tanan. Amen.”

Kung ang pinadayag malisod gayud alang kaninyo, paghangad ug hibaloa ang Dios alang niini. Mao lang kana ang paagi nga maangkon mo kini. Kinahanglan ang pinadayag nagagikan sa Dios. Wala gayud kini nagaabot pinaagi sa tawo, sa mga natural nga mga hiyas, kondili pinaagi sa Espirituhanon nga gasa. Mahimo pa gani ninyong isaulo ang Kasulatan, ug bisan pa nga maanindot kana, dili niini makahimo. Gikinahanglan nga usa kini ka pinadayag gikan sa Dios. Ginaingon sa Pulong nga walay tawong makaingon nga si Jesus mao ang Cristo gawas kon pinaagi sa Espiritu Santo. Kinahanglan nga dawaton ninyo ang Espiritu Santo ug dayon, ug diha lang dayon, nga mahimong ihatag sa Espiritu kanimo ang pinadayag nga si Jesus mao ang Cristo: Ang Dios, ang Maong Dinihogan.

(Gikan sa *Ang Kabatbatan sa Pito  
ka Mga Kapanahonan sa Iglesia*)

CEBUANO

©2011 VGR, ALL RIGHTS RESERVED

VOICE OF GOD RECORDINGS

P.O. Box 950, Jeffersonville, Indiana 47131 U.S.A

[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

**VOICE OF GOD RECORDINGS**

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)